

Beli tanah: PM cabar Mohamad Sabu

KUALA LUMPUR 15 Feb. — Datuk Seri Dr. Mahathir Mohamad mencabar Naib Ketua Pemuda Pas Pusat, Mohamad Sabu supaya membuktikan bahawa Kerajaan Kedah membeli tanahnya untuk dibuat sebuah peringatan (memorial) dengan harga yang lebih tinggi daripada tanah yang diambil daripada petani di Kerpan.

Perdana Menteri meminta Anggota Parlimen Nilam Puri itu membawanya ke mahkamah sekiranya dia boleh membuktikan tuduhan tersebut.

“Kalau dia boleh bukti dalam mahkamah, saya sanggup cabar dia...kalau dia berani, cakap betul-betul,” katanya pada sidang akhbar selepas Majlis Penerangan Perdana di Pusat Dagangan Dunia Putra (PWTC) di sini hari ini.

Menurut Dr. Mahathir: “Saya tidak ada memorial apapun, yang ada cuma tempat untuk menyimpan dan mempamerkan barang-barang yang diberikan sebagai cenderamata kepada Perdana Menteri terutama daripada pemimpin-pemimpin dari luar negara.

“Barang-barang itu saya tidak ambil dan ia diberi kepada kerajaan, dan ia perlu disimpan di satu tempat untuk dijadikan tatapan orang ramai, itu saja.

Dalam satu ceramah Pas tidak lama dulu, Mohamad Sabu telah menuduh bahawa tanah kepunyaan Perdana Menteri di Alur Setar dijual dengan harga RM70 sekaki persegi kepada Kerajaan Kedah untuk membina memorial, sedangkan petani di Kerpan hanya dibayar RM1 untuk satu kaki persegi.

Pengambilan tanah

Mohamad Sabu, yang dilantik oleh Pas supaya mengawasi pengambilan tanah rakyat oleh kerajaan, mendakwa Dr. Mahathir menghina rakyat Kedah kerana tanahnya diambil dengan harga mahal sedangkan tanah rakyat dinilai begitu rendah.

Bagaimanapun, rekod menunjukkan bahawa apa yang dimaksudkan oleh Perdana Menteri ialah nilai tanah sawah di Kerpan bukannya nilai tanah di negeri itu (Kedah) secara keseluruhan seperti yang didakwa oleh Mohamad Sabu.

Bulan lepas, Dr. Mahathir ketika diminta mengulas tindakan segelintir penduduk Kerpan menghalang kemasukan jentera untuk projek ternakan udang harimau di kampung itu, berkata, nilai tanah sawah mereka hanya mampu mencapai antara RM2,000 hingga RM3,000 serelong jika tiada pembangunan di sekitarnya.

Dr. Mahathir bagaimanapun berkata, beliau ada membeli sebidang tanah seluas kira-kira dua relung di Kedah ketika beliau belum menjadi menteri pada tahun 1967 dengan harga RM4,000, kemudiannya tanah itu diambil oleh Kerajaan Kedah untuk pembinaan jalan raya dan beliau hanya dibayar pampasan sebanyak RM8,000 sahaja.

Beliau menambah lagi, ia tidak ada kena mengena dengan pembinaan memorial kerana tempat yang dicadangkan untuk dipamerkan koleksi cenderamata itu ialah di Langkawi dan dakwaan Mohamad Sabu itu satu pembohongan.

Beliau kesal dengan kenyataan Mohamad Sabu dan berharap supaya Mohamad Sabu berkata benar.